

海陽縣志卷三十七

列傳六

郭廷序

林大欽

薛雍

章熙

謝承志

成子學

蘇志仁

郭大鯤

劉子興

陳學可

陳一松

廖瑚

潘璘

鄭旻

郭敬賢

傅大聘

海陽縣志

卷三十七

列傳六

楊一廉

子灌次子時芬

黃良豐

陳思俊

曾球

謝君錫

李思寅

弟思悅

鄒迪

林興

王化

唐伯元

已上明

明

郭廷序字循夫潮陽籍海陽人粹資遐志博學尚友領嘉靖壬午鄉薦師事黃泰泉寓廣城益加深造教淑後學皆一時雋選操守尤清介不苟居家孝友事兄廷秀猶父撫諸弟無閒言登嘉靖辛丑進士出令貴溪剛方不媚權貴惟輕徭薄賦端教育才動必由



禮獄無冤抑嘗卻王府濫索抑中使誅求遇旱虔禱甘澍輒應述職還任卒於維陽士民咸痛惜之

據黃志修

林大欽字敬夫世居東莆故號東莆父毅齋單舉大欽有異徵稍長聰穎異儔年十二從父至郡書肆見蘇氏嘉祐集絕好之市歸操筆爲文屈注奔騰神氣宛肖識者重之十八失怙拮据奉母力尤不能致書族伯廷相廷泰名孝廉也藏書萬卷因資以博通子史百家嘉靖辛卯就試督學王某奇其文薦於巡按御史吳麟更試李綱十事考據詳核詞旨凜然相與歎賞曰必大魁天下是年舉於鄉壬辰登進士廷對

策曰臣智識愚昧學術疏淺不足以奉

運天下皆已大治四海皆已無虞而乃拳拳於百姓之未得所爲憂是豈非文王視民如傷之心耶甚大美也然臣之所懼者陛下

海陽縣志

卷三十七

列傳六

二

負聰明神智之資秉剛睿仁聖之德舉天下之事無足以難其爲者而微臣所計議復不能有所補益於萬一陛下豈以其言爲未可盡棄而有所取之耶陛下臨朝策士凡有幾矣異時莫不光揚其名聲寵綬其祿秩然未聞天下之人有曰天子某日降某策問某事用某策濟某功者是豈策士之言皆無可適於用耶抑或可適於用而未暇採之耶是臣之所懼也臣方欲爲根極政要之說明切時務之論而不敢飾爲迂闊空虛無用之文以罔陛下陛下若以其言爲可信而不悉去之試以臣策付之有司責其可行則臣終始之願畢焉如或言不適用則臣有替愚欺天之罪俯伏以待罪譴誠所甘心而不辭也臣伏讀聖策有以見陛下拳拳於民生凍餒流離爲憂以足民衣食爲急此誠至誠惻怛以惠元元之念天下之所願少須臾無死以待德化之成者然臣謂陛下誠懷愛民之心而未得足民衣食之道誠見百姓凍餒流離之形而未知凍餒流離之實也夫陛下苟誠見夫百姓凍餒流離之實則必思所以富足衣食之道未有人主忍見夫民之凍餒流離而不思所以救援之者未有人主救援夫民之凍餒流離而天下卒至於凍餒流離而不可救者也今夫匹夫之心可行於一家千乘之心可行於一國何者以一家一國固吾屬也會謂萬乘屬天下者有救援天下眞實懇切之誠而顧不效於天下者哉是臣所未信也臣觀陛下臨朝凡有十餘年於此矣異時勸農蠲租之詔一下天

下莫不延頌以望更生然而惠民之言不絕夫口而利民之實至今猶未見者臣是以妄論陛下未知斯民凍餒流離之實未得足民衣食之道也臣聞之仁以政行政以誠舉王者富民非能家衣而戶食之也心政具焉而已矣夫有其心無其政則天下將以我為徒善有其政無其心則天下將以我為徒法徒法者化滯徒善者恩塞心法兼備此先王所以富足人之大略也臣觀史策見三代以養之民蓋日不服給矣文帝視當時之坐於困寒者蓋甚於塗炭也育之以春風沐之以甘雨煦煦然與天下為相休息之政而塗炭者祗席矣故後世稱富民者以文帝配成康亦誠有以致之也然而文帝固非純王者竊王者之似焉猶足以專稱於後世而況夫誠於王者而顧有坐視天下於凍餒流離者哉臣竊謂今日陛下愛民之心不為不切愛民之政不為不行然臣所以敢謂陛下於斯民之凍餒流離而未知其實於足民之衣食而未得其道者竊恐陛下有愛人之仁心而未能如王者之詳悉光明臣是以敢妄論陛下而云云也然臣所望仁政於陛下者非欲盡變天下之俗也非欲復井田下之田也亦曰宜時順情而為之制而不失先王之意爾臣請因聖策所及而條對之陛下策臣曰夫民匪耕則何以取食弗蠶則何以資衣斯二者亦王者之所念而憂者也今耕者無幾而食者

海陽縣志

卷三十七

列傳六

眾蠶者甚稀而衣者多又加之水旱蟲蝗之為災游惰冗雜之為害邊有煙塵內有盜賊何怪乎民受其殃日甚一日也此見陛下痛念斯民之病深揆困乏之本而急思所以拯救之也臣謂民之所以耕蠶稀而日甚其殃者游惰起之也冗離病之也若夫水旱蟲蝗之災則雖數之所不能無然君人之憂不在焉何者恃吾耕蠶之具素修而無所耗則雖有水旱蟲蝗而無所害臣聞有道之國天不能災地不能厄夷虜盜賊不能困以恆職修而本業固倉廩實而備禦先也臣聞立國有三計有萬世不易之計有終歲應辦之計有因時苟且之計萬世不易之計者大學所謂生之者眾食之者寡為之者疾用之者舒也故王制三年耕則有一年之積例之則九年當有二年之豫其終歲所入蓋足以自給而三年之蓄恆可以豫待不虞如此者所謂天不能災地不能厄夷虜盜賊不能困臣前所謂王者之政陛下今日所方欲切求而勵之行者所謂終歲應辦之計者蓋生財之道未甚周節財之道未甚盡一歲之入僅足以充一歲之用其平居無事尤未見其甚儉值有凶荒盜賊之變則未免厚斂重取以至於困敗而不能自振若此者蓋素備不修因時權設漢唐以下治天下之大率而非吾陛下之所以奉天理物而深厚國脈者其所謂因時苟且之計者蓋平時之所以斂取於民頗無其度而取民惟畏其不多用財惟畏其不虞方其無事百姓已不能自給迨其有變則不可復為之計矣此

刻制國無紀潰亂不時蓋昏亂衰世之政焉臣前所謂起於游惰
病於冗雜之弊亦略有同於是陛下今日所方欲改轍而易海內
之觀者臣謂今日游惰之弊有二冗雜之弊有三此天下之所以
長坐於困乏而志士至今憤惋而歎息者也其所謂游惰之弊二
者一曰游民一曰異端游民眾則力本者少異端盛則務農者稀
夫民所以樂於游惰者何也蓋起於不均不平之橫征病於豪強
之兼併小民無所利於農也以爲逐藝而食猶可以爲苟且求生
之計且夫均天下之田然後可以責天下之耕今夫里閭之小民
剝於汙吏豪強者深矣散食於四方者眾矣大率計今天下之民
其有田者一二而無田者常八九也以八九不耕之民坐食一二
有田者之粟其勢不得不困然而散一二有田者之業以爲八九
自耕之養其勢未嘗不足議者病游民之眾也或有逐商之說然
臣以爲游民之商本於不得已也而又無所變置而徒爲之逐臣
懼夫商之不安於商也臣竊謂今日之弊源已深更化者當端其
緒而綏理之理而無緒勢將驅力農之民而商又將驅力商之民
而盜也天下爲盜國不可久其便莫若頒限田之法嚴兼併之禁
而又擇循良仁愛惻怛之吏以撫勞之法以定其世業禁以防其
姦貪吏以得其安輯游民其將歸乎若夫異端者蓋本無超俗利
世之習而徒竊其滅額逃刑之利不工不商不農不士以自便其
身且其倡無父無君之教於天下將使流風之未可已焉此其爲

海陽縣志

卷三十七

列傳六

四

害甚明故臣不待深辨然臣竊悼俗之方敝也禿首黃冠充斥道
路珠宮瓊宇照耀雲漢此風未艾效慕者眾非所以令眾庶見也
非所以端風正紀之要體也故臣願陛下嚴異端之禁敕令此輩
悉歸之農其有不如令者許有司治罪不赦蓋非惟崇力本之風
抑且彰教化之道此臣拳拳所望於陛下之至意也其所謂冗雜
之弊二者一曰冗員二曰冗兵三曰冗費冗員之弊必澄冗兵之
弊必汰冗費之弊必省三冗去而財裕矣夫聖人所以制祿以養
天下之吏與兵者何也更有治人之明則食之也兵有敵人之勇
則食之也是其食之者以其明且勇也其或有不明不勇者則非
耕不得食非蠶不得衣何者無事而祿亦先王之所儉也今夫天
下之吏與兵何如也臣非欲盡天下之吏與兵而不祿之也臣徒
見任州縣者固有軟罷不勝而坐祿者焉隸兵籍者固有老弱不
勝而濫食者焉且入貲之途太多任子之官太眾簡稽之責不嚴
練選之道有虧臣是以欲於此輩一澄且汰焉其所以去冗濫而
寬民賜者不少也若夫冗費之弊不能悉舉卽其大而著者論之
後宮之燕賜不可不節也異端之奉不可太過也土木之役不可
不裁也陛下端身以率物節已而居儉其於三者固未可議焉然
竊見天下之大民物之眾九州四海之貢尺帛粒米之賦山林川
澤之稅日夜會稽以輸太倉可謂盛矣而國計未甚充國用未甚
足以爲必有所以耗之者矣且夫土上之賦其下者以一而下之所

以供夫上者常以百蓋道路之耗漕輓之費京師之一金田野之
百金也內府之百金民家之萬金也以百萬民家之資費之於一
燕饗一賜予一供玩者何限臣故曰冗費在今日亦有未盡節者
特其有以冗而費之者則其勢將橫征極取天下不至於饑寒凍
餓大敗極敝不已臣讀史記見周文王方其受命之時地方不過
百里而四方君長交至於其國其所以燕饗勞來之典不容終無
然而當時百姓各足饑寒不病故民誦之詩曰勉勉我王綱紀四
方蓋慶之地傳至於其子孫以八百國之財賦自養一人宜其甚
裕而無憂而民反流離困苦至於黃鳥化離之詠作焉臣於此見
若人節已以利人則易為功廣費以厚斂則難為力臣是以拳拳
以省冗費為陛下告也陛下策臣曰固本朕不類寡昧所致上不
能參調化機下不能作興治理實憂而且愧焉此陛下憂勤之言
禹湯罪已之辭也然臣謂陛下非徒為是言也須欲勵是行也夫
君人之言與士庶不同一或不徵天下玩之後雖有美意善政人
且駭疑不信陛下往年嘗有恤農之詔矣然而天下皆以為陛下
之虛言何者誠見其言若是焉而未見其惠也今陛下復策臣若
是焉臣以為亦致憂勤之實而已欲致憂勤之實須速行臣前所
陳者臣前所陳者皆因聖策所及條對要之所以振弊利世之道
猶有未盡於此臣請終之夫山澤之利未盡墾則天下固有無田

海陽縣志 卷三七 列傳六

之憂今夫京師以東蔡鄭齊魯之閒古稱富庶強國三代財賦多出於此漢唐以來名臣賢守其所以興田利而裨國用者溝洫封
澮之迹往往猶存而今悉為空虛茅葦之地此古人所謂地利猶
有遺者而陛下所使守此土者一切苟且應職而無為任此憂者
此北人所以長坐仰給於東南少有凶荒不繼輒輒轉漕壑不能
自給以生者地利未盡也臣意陛下莫若嚴其守令重選才幹忠
誠為國之士使守其地而專一以興田利為事朝廷寬其禁限聽
其便宜而惟以此為田利課則海內當有越過者出焉不數十年
之後則江北之田應與江南類可省江淮數百萬之財賦而紓北
人饑寒凍餒之急一舉而利二焉大惠也陛下能斷而行之大勇
也或曰非不欲行也如南北異宜何臣請有以折之夫今日所謂
空虛荒瘠無用之地者非向時所謂富實而所托賴以興起之本
區乎昔以宣實今以荒虛臣誠未見其說亦曰存乎人耳魏人許
洵其成也操終賴之省粟數萬今天下之大又安知其無能為棗
祗者乎臣是以願陛下以此為田利課則山澤墾矣臣又聞之關
市不征澤梁無禁王者所以通天下大公大同之制也自漢桑宏
羊以剝刻之術媚上而征權之法始詳歷代因之而不革大公之
制未闢也然臣終以此為後世衰亂苟且之政今朝廷之取民茶
有征酒有權山澤有租魚鹽有課自一草一木以上之利莫不悉

籠而歸之公其取下悉矣夫上取下悉則其勢窮夫獸窮則逐人窮則詐今陛下之民將詐乎司國計者非不知其勢之不可以久也然而明知其弊而冒之者誠曰國家利權之所在也臣以爲利以總制六合而正服民心張大國體者固在道德之厚薄不問財賦之有無臣觀征利之說不出於豐泰之國恆出於衰亂之世繼繼然與民爭利者匹夫之事也萬乘而下行匹夫之事則其國辱非豐泰之時所尚也陛下何不曠然爲人所難思大公之法去衰亂之政令天下人土爭言曰惜哉漢唐宋不能舍匹夫之利以利人至我明天子然後能以天子之大體鎮服民心焉陛下何久於此而不爲也臣願陛下息山林關市之征焉使天下知大聖人所作爲過於人萬萬也若夫悉推富民之術則平糶之法不可不立也常平之倉不可不設也奢侈之禁不可不嚴也凡若此者史策之載可考陛下可能舉而行之成典具在故臣不必深論之也由臣前所陳而言之均田也擇吏也去冗也省費也由臣後所陳而去而蠹除費省而用裕土闢而地廣征薄而惠寬利通而財流奢禁而富益入政立而王制備矣陛下果能行臣之言又何憂於百姓之凍餒流離又何至於有煙塵盜賊之警又何患不順乎道而歸乎化哉通變時宜之道其或悉備於此然臣以爲此數者皆不

海陽縣志

卷三十七

列傳六



足爲陛下之難所患人主一心不能清虛寡欲以爲寬民養物之要則雖有善政美令未暇及行蓋崇高富貴之地固易爲驕奢淫逸之所是故明主重內治也故古之賢王遐觀遠慮居尊而慮其危處富而慎其溢履滿而防其傾誠以定志慮而節逸欲圖寅畏而禁微邪也故堯曰兢兢日業禹曰孜孜湯曰檢臣以爲數聖人固得治心之要矣臣嘗觀漢武帝之爲君方其臨軒策士奮志六經也雖三代之英主不能過焉洎其中年多欲一念不能自勝公孫宏桑宏羊張騫卜式文成五利之輩各乘其隙而售之卒使更變紛然天下坐是大耗臣是以知人主一心不可使有所嗜好形見於外少有沈溺爲禍必大故願陛下靜虛恬慮以爲清心節欲之本母以深居無事而好逸游毋以海宇清平而事遠夷毋以物力豐實而興土木毋以聰明英斷而尚刑名毋以財賦富盛而事奢侈羨邪說而惑神仙澄心正極省慮虛涵心澄則日明慮省則日精精明之運旁燭無疆舉天下功業惟吾所建者豈止於富民生足衣食而已哉臣始以治弊治法爲陛下告終以清心寡欲爲陛下勉蓋非有驚世絕俗之論以警動陛下然直意以爲陛下之所以策臣者蓋欲聞剴切時病之說故敢略盡其私憂過計之辭衷情所激誠不知其言之猶有所憚亦不知其言之猶有所隱惟陛下寬其狂易諒其樸直都御史汪鉉得大欽卷詫曰安有對策無而一賜覽之天下幸甚

言語者大學士張孚敬曰是嫻於詞必當上意時已定孔高二生
卷乃附二卷封進上覽之親擢第一官詞垣三年疏乞養歸結講
堂華巖山與鄉子弟講貫六經究性命之旨海內賢士大夫想望
丰采如王龍溪羅念庵翁東涯時相寓書言學問之意獨大欽刊
落聞見實能於所性本體著力修存優游典籍怡情山水所作詩
歌蕭然自得丁母憂免喪葬於東莆山麓歸道病卒著有東莆詩
文集六卷祀鄉賢

據詳佩撰傳
本集參修

薛雍字子容饒平學海陽人郎中張公翹謫潮雍上書論時事張
大奇之嘉靖辛卯鄉薦以親老不會試讀書蓮花山間親病月夜
踉蹌歸虎眈眈伏草際不爲卻步喜參稽天下之務及天官律歷

海陽縣志

卷三十七

列傳六

七

諸書著策四十三篇詳明博洽偉然經濟才親沒數上公車不第
嘗語人曰吾視恆情所羨不啻土苴矣未仕而卒有南湖詩集傳

世據府
志修

章熙字世曜高祖而下世有隱德父野庵熙少負奇氣稍長通詩
書三禮與兄煥齊名人稱二章先生嘉靖辛卯舉於鄉登甲辰進
士是歲同郡甲榜七人熙官拜行人充節使丁未方考最以策馬
趨朝與迴車遇馬驚觸輻折所佩牙牌因上書自劾有詔奪俸遂
弗獲與臺省選俄遷行人司副轉地官員外管太倉銀庫察得匠
役倚內監爲奸以僞銀進者發邊戍繇是中貴肅然庚戌京師戒
嚴援兵四集熙以廉勤兼攝諸曹事居中調度因上疏請開便門

出糧饌以給軍軍威遂震已而通州守吏以兵食告匱聞上怒責問尚書及諸曹郎諸曹郎輒分其責於熙熙不辯竟坐貶出爲山東行省幕史明年有事東封熙從諸大寮有司致告後徙南雍博士厯南戶曹員外滁州兵變奉檄往撫及還求省父遭訃至卽日東奔服闋強起復補地官員外後出爲廣西按察司僉事分巡蒼梧白馬三洲故險道也江路逶迤林木深阻諸蠻窟伏爲患久矣至首咨民瘼白於督府檄縣邑治火具大斧長鎗之屬以千數因下令調集諸路營兵統以偏裨而躬履其地發縱指使度其地勢高下而刊夷之盡伐其樹赭其山分兵守焉自是諸蠻奔突竄伏不敢復出又擒僞將勦黠巢出諸囚繫皆無愧爲憲吏顧獨以嚴

海陽縣志

卷三十七

列傳六

八

見忌竟坐免歸爲時論所惜云

據獻徵錄修

謝承志字尚齋浩之孫鄉賢紀之元孫也嘉靖甲午舉人漳州延平府通判陞順慶府同知宦轍所至地方利弊多所釐剔口碑翕然及里居修祖祠益祭業置塾興學世稱其善

據府志修

成子學字懷遠號井居嘉靖丁酉舉人登甲辰進士授峽江令邑故多郵傳雜派子學多所裁革使客鞅鞅不恤有無主荒糧奸胥緣爲利延累無已爲請均攤闔縣使之縣民鄭文生母死於虎焚牒山神設檻以待翼日虎斃行取擢兩淮監察御史累官太僕寺卿初子學事王陽明得良知宗旨又與吉水羅洪先往復寓書闡明理學卒祀鄉賢建坊

據周志修

蘇志仁字道先號似峯生而穎敏閒疏諸儒傳註之失宿學皆自
謂不及太守策其文置異等薦補博士弟子自是名聞郡中嘉靖
丁酉舉鄉試登甲辰進士初除池州推官郡多豪家而推官職司
理吏故純任法以搏擊爲能志仁獨持以寬未幾權甯國守時有
僞爲楚王世子遊者所至如市王乘傳東至甯志仁不與見使人
言於王召回後察其僞擒之以薦徵入爲吏部稽勳主事歷調驗
封考功文選移疾自劾歸尚書強起不從銜之坐降級補外判兩
浙尚書罷量移同知興化尋轉江西按察僉事有惠政授福建提
學巡試畢陞大理寺卿未至京卒祀江西名宦又祀鄉賢志仁博
極羣書自經史子集以至金石彝鼎之文靡不淹貫而於天文律

海陽縣志

卷三十七

列傳六

九

歷尤精所著有抱拙堂稿中興別響日記存疑諸書

據徵獻錄天官年譜參修

郭大鯤字時化

周府志作澄海人今從阮志

生七月而孤事母孝六歲時人遺

桃三留其二奉母父老異之十三補邑諸生嘉靖庚子舉人辛丑
進士授南靖知縣興學造士鋤暴抑強禁服毒刑賭盜築陂塘以
勞瘁卒於官年二十八邑人哀之祀名宦建遺愛亭御史陳儲秀

按廣檄祀鄉賢

據阮志參周志修

劉子興字賓之少有奇節登嘉靖庚子鄉薦辛丑進士授臨海知
縣以治行徵赴闕遷兵部主事歷車駕郎中兼職方事出爲福建
參議丁外內艱服闋補楚藩主太和山賦遷四川建川兵備道倭
奴寇潮震及先塋子興聞變痛絕值考績當時紆道返鄉安厝尋

轉廣西參政擢福建按察使轉布政使以病乞休未上而廣西左丞之命下詔許致仕萬厯初吏部疏名上請下有司覆實起用文至而子興已卒其知臨海賑饑禱旱號稱循吏任職方時北虜逼近郊居中調度悉中窳要在楚則不與太和貢錢能以正懾中貴在蜀則訪諸葛渡瀘故道而嚴吐蕃南詔會兵入寇之禁番酋戴德凡所至咸有名績而端介自守俸入外不取一錢家居十年清修德讓尤爲士大夫所推嘗謂士人一解組卽宜謝絕干謁若俛首僕僕爲人役曾不若居官署鍵門謝客猶能遠俗氛持素節也所著有見湖遺稿藏於家

據井丹集
張志參修

陳學可字子敬號古亭古樓人爲人魁偉負奇節事親篤孝平居

海陽縣志

卷三七

列傳六

十

無慢容褻語儕輩以莊見憚少從薛侃講道中離山得聞性學嘉靖庚子登鄉薦授太甯令邑故稱盜藪學可至收捕殆盡毀淫祠整風俗凡以細故興訟者必委曲發其天良溫語如家人兩造皆爲感泣未幾丁母憂服闋補青陽令豪戶某坐罪暮夜懷金求免厲色卻之論如法邑相沿有里派日奉錢二千名曰供官悉罷之一絲一粒不以累民尋調漢川歲饑多逋賦上官檄催如星火學可苦心調劑民困蘇而正供如額咸推應變才時朝廷興土木楚省大吏承望風旨遴員四出廣採楸枅重以需索民不堪命乃上書撫按曰有形之伐削萌蘖猶生無形之斧斤邦本不固力請停採遠近皆蒙其福逾年丁父艱築室墓旁顏其廬曰瞻依壬戌春

倭寇犯隆津發其祖塋學可日夕號哭攜重貲尾賊數百里贖遺骸歸哀毀不釋尋以疾卒子其美別有傳據周志修

陳一松字宗巖嘉靖癸卯舉人丁未進士授庶吉士除兵部主事遷湖廣僉事以忤御史乞歸終養母寢疾侍湯藥衣不解帶者逾年比卒哀毀廬居免服補蒼梧道僉憲遷福建糧儲參議湖廣副使陝西參政福建按察使江西布政應天府尹所至有聲去時民遮道留之咸爲立祠祀焉轉大理卿晉工部左侍郎督修皇陵加俸服一級乞省墓歸杜門謝謁卒於家諭祭葬一松居官不迎合上意然亦不爲刻覈故無後艱云著有玉簡堂集行世據張志阮志參修

廖瑚字邦美嘉靖癸卯舉人教諭平和兩與鄉闈分校名得人尋

海陽縣志 卷三十七 列傳六

轉衡府紀善乞養歸時年三十二親沒居喪以孝稱子廣渤別有

傳據張志修

潘璘字林陽嘉靖己酉舉人授隨州學正陞新甯知縣遷泉州判擢霑益知州皆著治聲有文學嘗預修郡志子維翰萬厯歲貢官至楚州教授同上

鄭夏字世穆海陽學籍揭陽嘉靖丙辰進士初授兵部主事歷武選郎中守大名歸德蠲逋革弊卓有循聲督學貴州山西士論翕然尋擢湖廣參政是時江陵柄政仕其鄉者疲於奔命夏獨正身率屬不激不隨後遷四川副使晉貴州左布政察匿田正詭籍豪酋懾服未期月卒於官百姓哀之祀貴州名宦著峯山談言哀拙

集據周志粵東
詩海參修

謹案張志旻名不見志表又無傳此據粵東詩海補詩海亦
稱爲揭陽人然考邑學有旻所爲建坊關路記中有余昔備
庠中博士弟子語則其附海陽學無疑

郭敬賢字桂溪嘉靖癸丑進士選庶常忤嚴嵩謫判通州尋陞工
科給事中抗疏極陳時政累官至禮科給事中年三十四卒於官

祀鄉賢據張志修

傅大聘字莘野嘉靖己酉舉人任蒼梧令有聲與海忠介同年忠
介以都御史召用道出蒼梧手書清慎勤三字顏其堂又爲撰傳

氏義莊記略曰余戊辰歲以直見忤嘗過蒼梧宿一度見衙無半
點心甚奇之恨不能薦之於朝亥早登縣堂令工房吏

海陽縣志卷三十七 列傳六

七

將自出金代製一扁大書清慎勤挂於堂上以表其行之異而尊
祖厚族之心則未知今以義莊請記適有以投余素奇之心乃欣
欣然題之或有問於余曰莘野囊無半點何義莊之設余應之曰
莘野官清而祖厚用儉而見大其所以立義莊以助祖祭興族學
濟族貧收枯異姓者皆其登科時所出亭價金湊已承祖餘積及
族派推族長繼感運用創置所致宦囊一毫無預祖祭有不足者
增之族有蒙學者束之族有游泮者衣巾之油火之族有貧者濟
之輕重有差而異姓之枯亦收之見匍救意若莘野者可謂官不
塵而能清莊不私而能義宛然有范氏風者豈俗宦徒瓊其室頃
其租專以傳子孫不幾時而爲不肖子孫傾覆殆盡者所可類哉

以抗直忤上官歸卒年九十五曾孫天祐崇禎舉人同上

楊一廉字思介原籍大埔自父成都府經歷鳳遷海陽遂家焉嘉

靖辛亥拔貢歷新塗德化兩學訓導升唐府教授時王重儒術士

競以詞章獻媚廉獨侃侃陳大義援經例事以莊嚴見憚尋告歸

卒祀鄉賢著金川歸田稿子瀧字用仁號訥初隆慶庚午舉人初

任辰州通判會權貴人至楚按事將抵辰州瀧署狀言民貧乞
滋擾請減從比至供具甚簡權貴怒撫以小事謫經歷凡六月
嘉興判官在籍吏部郎怙勢欲奪民居爲別墅其人不予致之死
事覺聞故人來按浙江吏部郎且喜謂可藉以出罪也瀧覺亟論
如法巡按羅織之再罷爲經歷然直聲大振南都士大夫皆稱之
曰骨鯁楊君尋辟署江甯尹遷武定牧喟然曰人生入仕宦途如
行荆棘中沉瀧之峭直乎乃乞休屏迹田間海陽令與瀧有舊未
嘗投一刺次子時芬字叔鬯少有才名著楚遊集謳遊集季子時
英萬歷庚子舉人曾孫開闈元孫州俊別有傳據周志修

黃良豐嘉靖時治家子性至孝父母色不悅輒奉杖跪請必解顏

海陽縣志

卷三十七

列傳六

志

乃已執父喪三年飲水不茹葷結廬墓側日嚮治以養母夜則就
宿焉或與之食必歸以遺母居母喪值倭寇至抱棺曰母無恐兒
在此倭感動引去督學旌其門曰孝子之門據阮志修

謹案韓江聞見錄載良豐父棺在殯值鄰舍火良豐在外衝
燄入奔哭棺側火自滅四鄰灰燼獨良豐無恙此傳聞異詞
或兼有二事未可知也

陳思俊割股愈父病踰二年父卒廬墓三年不數年亦卒里人傷

之

據張志修

曾球嘉靖乙卯鄉薦隆慶聞知南靖邑西橋南田恆苦旱球爲鑿
新渠以資灌溉又開濬城濠接引溪流而東之墨場二十四鄉俱

賴焉官終泉州府判據福建通志修

謝君錫貢生官福安訓導嘉靖乙未倭主君錫與教諭程箕分守大小西門流矢貫面不爲動城陷君錫趨歸學召集諸生申明大義朝服拜先師北向拜闕南向拜親觸柱死君錫爲諸生時與林大欽善大欽卒力存其後潮陽林大春爲文贈行稱其取友信者其教人必忠蓋不愧斯言云據福建通志參張志修

李思寅字子衷父一莊嘉靖丁酉舉人得州通判兄思悅同思寅中式嘉靖乙卯鄉薦思悅丙辰進士官至戶部郎中思寅乙丑進士弟思振萬曆癸酉鄉薦己丑進士銅陵知縣嘉靖閏思寅知建陽邑經兵燹民困徵輸白當事釐革倍納之例嚴懲健訟惡習有

海陽縣志 卷三十七 列傳六

四

劇盜殺人攫金遠逸以方略捕治之課士興行教民行朱熹鄉約在任六年邑大治擢刑部主事陞刑部郎中據張志參福建通志修

鄒迪字時吉父守愚任戶部侍郎謚襄惠原福建莆田人至迪始籍海陽嘉靖辛酉受知太倉王文肅公授中書舍人轉戶部主事督理白糧釐剔夙弊尋卒祀鄉賢著有青那山人集孫鑿別有傳

據張志修

林興龍溪郡人嘉靖閏爲海豐典吏以謹飭聞時莆田魏一恭以論權貴謫判潮廉興賢延爲內幕魏不攜家人只一老僕自隨興與其并爨灌園給朝夕會魏鹽權差竣有羨金掾以成例請魏問興曰君侯名節在前勲業在後奚用此長物爲魏嘉納每誇座

客曰余署有林興蓋益友云後興謁選得端州腰古驛丞轉黔省臥龍番長官司吏日益勵清苦每自矢曰興不肖不能從文墨起家今老矣復冒然爲自潤計將令人讓刀筆吏鮮恥謂生平何不踰年告歸時鄭旻督學黔省稔其貧助之行每對監司言吾鄉異途有此清白吏奇矣卒年八十三

據林忠宣集修

王化字欽孚別號贊宇生而穎異自垂髫輒有大志居田閒無所師日讀書自行成誦嘉靖己酉補諸生乙卯甲子兩副省額都人士咸願師之自是斯文自任論說非濂洛新安不道居恆遲遲若不出口至樹旗鼓擁皋比上坐則津津然揚扈典謨上下今古發前人所未發故出其門者皆通知經術萬曆壬午自羊城歸歿於

海陽縣志

卷三十七

列傳六

七

梅州門人林熙春爲葬棉陽之原

據林忠宣集修

唐伯元字仁卿嘉靖舉人萬曆甲戌成進士授萬年令陞南京戶

部主事旋晉郎中進石經大學上留覽言官詆其指斥新學謫判海州升保定推官擢禮部主事疏奏請端大本引世廟遺詔語極剴切上爲感動辛卯典試湖廣晉尚寶丞丁艱起補吏部員外郎歷文選司郎中時上方切責選司伯元悉心釐剔銓政肅清尋疏乞歸踰年卒年五十八著醉經樓集禮編易註太乙堂采芳亭諸

稿白沙文編二程語類祀鄉賢

據府志修

謹案伯元周志作澄海人攷伯元嘉靖四十年舉人萬曆二年進士澄海於嘉靖四十二年始由海陽之關望巡檢司析

置其子孫今又皆爲海陽人故采其傳補之

海陽縣志

卷三十七

列傳六

志